



Mula
Mustafa
Bašeskija

**JU OŠ "Mula
Mustafa Bašeskija"**
Logavina 52, 71000
Sarajevo, Bosna i
Hercegovina tel: +387
(33) 238-151; fax:
+387 (33) 238-151;
skola@osmmbsa.edu.ba
Područna škola
Sedrenik tel: +387
(33) 574-350; fax:
+387 (33) 232-007



ČLANOVI REDAKCIJE:

Zejneb Balić,
Esma Muminović,
Farah Nukić,
Nadya Bektić,
Zehra Šeko, Amina
Saračević, Berina
Salihagić,

Naslovna strana:

Amina Šeko

Tehnička podrška:

Eren Burazerović

SADRŽAJ

- 1. Čestitka direktorice povodom Dana škole**
- 2. Školske aktualnosti**
- 3. Neki novi klinci**
- 4. Intervju sa...**
- 5. Bajram u našoj školi**
- 6. Perom i kistom naših učenika**
- 7. Savjet plus**
- 8. Isprćaj naših maturanata**

Čestitka direktorice povodom Dana škole



Dragi učenici, cijenjeni roditelji, kolege i kolegice 22. maj za nas je jako poseban obzirom da ga svi zajedno obilježavamo kao Dan škole.

Škola je naša zajednička kuća, a njezin rad i napredak zavisi od našeg truda i rada. Svi skupa ulažemo jako mnogo vremena, rada, truda i zalažemo se da ime naše škole bude ponosno izgovarano.

Želim istaći da su naši učenici sa svojim nastavnicima postigli brojne uspjehe i osvojili mnoga priznanja i nagrade za svoja znanja i vještine te im još jednom od srca čestitam!

Posebnu zahvalnost dugujemo našim roditeljima jer su uvijek spremni za saradnju i zajedno sa prijateljima škole pružaju veliku podršku našem radu i razvoju. Trudimo se da zajedničkim snagama našim učenicima obezbijedimo što bolje uslove za napredovanje te da razvijamo i modernizujemo naš svakodnevni rad.

Svima vama koji školu "Mula Mustafa Bašeskija" doživljavate kao svoju upućujem iskrene čestitke za Dan škole!

DRUGO KANTONALNO TAKMIČENJE U ŠAHU

Kantonalno takmičenje u šahu u organizaciji Ministarstva za odgoj i obrazovanje, Javne ustanove Institut za razvoj preduniverzitskog obrazovanja Kantona Sarajevo i Šahovskog saveza KS, je održano 2. marta 2023. godine u OŠ "Grbavica 1."

Našu školu predstavljali su učenici sedmog razreda :

Najda Drinjaković, Eman Heco, Berk Bašović i Harun Novalija.

Čestitamo učenicima na hrabroj borbi sa mnogo iskusnijim protivnicima.



TAKMIČENJE IZ MATEMATIKE

Na Općinskom takmičenju iz Matematike naši učenici postigli su zapažene rezultate. Školu su predstavljali učenici šestog razreda: Zehra Šeko, Rafael Lovrić i Džan Bašović. Iz sedmog razreda predstavnici su bili: Najda Drinjaković, Ajna Rožajac, Emin Mašić i Harun Novalija, iz osmog razreda: Belma Hantalašević, Dino Bolić i Davud Bahto, dok su predstavnici naše škole iz devetog razreda bili: Nejra Drinjaković, Amina Šeko i Emina Ganić. Ekipno šesti i deveti razredi su osvojili prvo mjesto, a pojedinačno Zehra Šeko prvo mjesto, Davud Bahto prvo mjesto, Rafael Lovrić drugo mjesto, Amina Šeko treće mjesto. **Čestitamo** učenicima i nastavnicima Nedini Bećirović i Taibu Hadžiću.



Na Općinskom takmičenju iz Geografije ekipa naše škole osvojila je ekipno 1. mjesto, dok su u pojedinačnoj konkurenciji učenici osvojili sljedeća mjesta:

- Ajša Lepenica 1. mjesto (prolazak na Kantonalno takmičenje)
- Nejra Drinjakovć 2. mjesto (prolazak na Kantonalno takmičenje)
- Emina Ganić 7. mjesto
- Lejla Salihagić - rezerva.

Na Kantonalnom takmičenju iz Geografije učenice IX razreda koje su predstavljale našu školu, od ukupno 64 škole, osvojile su ekipno 6. mjesto.

Čestitamo učenicama i nastavniku Narcisu Hadžiabdiću na postignutom uspjehu!



OPĆINSKO TAKMIČENJE IZ INFORMATIKE

Na Općinskom takmičenju iz Informatike našu školu predstavljali su Emrah Kulo, Afan Kirlić i Kenan Zlatar.

Zahvaljujemo se učenicima i nastavniku Taibu Hadžiću na trudu i radu kako bi dostojanstveno predstavili školu.



KANTONALNO TAKMIČENJE IZ NJEMAČKOG JEZIKA

Na Kantonalnom takmičenju iz predmeta Njemački jezik našu školu je predstavljala Nejra Drinjaković, učenica devetog razreda.

Zahvaljujemo se Nejri i nastavnici Lamiji Borovina na uloženom trudu.



KANTONALNO TAKMIČENJE IZ ISLAMSKE VJERONAUKE

Na Kantonalnom takmičenju iz Islamske vjeronauke našu školu su predstavljale učenice Sarah Alhasan iz VIII razreda, osvojivši 9. mjesto, i Amina Šeko, iz IX razreda, osvojivši 13. mjesto u veoma jakoj konkurenciji.

Čestitamo vrijednim učenicama i nastavnici Ešrefi Fakić.



OPĆINSKO TAKMIČENJE IZ FIZIKE

Dana 5. 4. 2023. godine imali smo čast ugostiti učenike i nastavnike iz starogradskih osnovnih škola na Općinskom takmičenju iz Fizike. Naš učenik, Dino Bolić, zauzeo je odlično treće mjesto u kategoriji osmih razreda.

Takođe, ekipa osmih razreda zauzela je ekipno treće mjesto.

Čestitamo učenicima i nastavnici Sabini Kavazović.



TAKMIČENJE IZ PREDMETA GRAĐANSKO OBRAZOVANJE/DEMOKRATIJA I LJUDSKA PRAVA

Učenici/ce 7-1 razreda, predstavnici sva četiri tima, su u okviru „Projekta građanin“ iz predmeta Građansko obrazovanje/Demokratija i ljudska prava osvojili prvo mjesto na Općinskom takmičenju. Na Kantonalm takmičenju učenici/ce 7-1 razreda u okviru „Projekta građanin“ iz predmeta Građansko obrazovanje/Demokratija i ljudska prava osvojili peto mjesto. Čestitamo našim učenicima i nastavnici Elvedini Ličanik.



TAKMIČENJE IZ PRVE POMOĆI

Na Općinskom takmičenju iz Prve pomoći ekipa naše škole osvojila je prvo mjesto. Školu su predstavljale: Nejra Drinjaković, Una Biberović, Amna Alimajstorović, Ema Softić, Amina Šeko i Najda Drinjaković. Ista ekipa otišla je na kantonalno takmičenje i zauzela zavidno četvrtu mjesto!

Čestitamo vrijednim učenicama i nastavnici Emini Smailbegović na izuzetnim rezultatima.



OPĆINSKO TAKMIČENJE IZ TEHNIČKE KULTURE

Općinsko takmičenje iz Tehničke kulture održano je 26. 4. 2023. godine, a naša ekipa zauzela je prvo mjesto.

Čestitamo našim takmičarima i nastavnici Nihadi Begić!




OPĆINSKO TAKMIČENJE HOROVA UZ PRATNJU

Na Općinskom takmičenju horova uz pratnju, hor naše škole osvojio je treće mjesto. Čestitamo učenicima i nastavnici Branki Popović.



KANTONALNO TAKMIČENJE IZ ENGLESKOG JEZIKA

Na Kantonalnom takmičenju iz Engleskog jezika naša Lejla Salihagić zauzela je dvanaesto mjesto osvojivši 88 bodova. Čestitamo Lejli i nastavniku Irfanu Dupovcu.



TAKMIČENJA IZ HISTORIJE

Ekipa VII razreda u sastavu: Agić Džan, Heco Eman, Kurtović Emina, Novalija Harun, Serdarević Omer i Zuko Jasmina ekipno je osvojila 1. mjesto na Općinskom takmičenju iz Historije s temom "Kultura i život Bošnjana - pismenost". Kao prvoplasirana na Općinskom takmičenju naša ekipa uzela je učešće i na Kantonalnom takmičenju iz Historije, te od ukupno 64 škole na nivou Kantona zauzela 9. mjesto.

Čestitamo učenicima i nastavniku Narcisu Hadžiabdiću !



KANTONALNO TAKMIČENJE IZ BOSANSKOG JEZIKA I KNJIŽEVNOSTI

U „Prvoj osnovnoj školi“na Ilidži održano je Kantonalno takmičenje iz Bosanskog jezika i književnosti.

Učestvovalo su 64 osnovne škole Kantona Sarajevo.Našu školu predstavljale su Ajna Rožajac koja je zauzela petnaesto mjesto i Belma Hantalašević koja je zauzela osamnaesto mjesto.

Čestitamo našim učenicama i nastavnicu Enisi Balićevac na uloženom trudu.



Festival dječije umjetnosti FEDU

Na Književnom konkursu za najbolju bajku koji je raspisao Festival dječije umjetnosti FEDU učestvovali su učenice VI-2 razreda naše škole, Zehra Šeko i Nadya Bektić.

Zehra Šeko osvojila je treće mjesto svojim radom koji nosi naslov "Kristalno srce Florije", a Nadya Bektić je svojim radom "Naja i skriveni grad" zaslužila pohvalu žirija.

Zehri i Nadyi čestitamo od srca i želimo još mnogo napisanih i proživljenih bajki!



KANTONALNO TAKMIČENJE IZ BOSANSKOG JEZIKA I KNJIŽEVNOSTI ZA UČENIKE RAZREDNE NASTAVE

Na Kantonalm takmičenju iz Bosanskog jezika i književnosti za razrednu nastavu, naše učenice postigle su izuzetne rezultate.



Sara Ljušaj 4-1 PRVO MJESTO

Učiteljica : Rasiha Bučo

Ajna Ibrahimović 3-2 TREĆE MJESTO

Učiteljica : Aida Dajanović

Nadža Ćurovac 5-2 ŠESNAESTO MJESTO

Učiteljica : Jasmina Karasalihović

Čestitamo talentovanim učenicama i učiteljicama koje su ih pripremale.



,,OTVORENI DAN HEMIJE“

Učenici devetih razreda su u pratnji nastavnice Vedrane Džindo posjetili manifestaciju "Otvoreni dani hemije" na Prirodno-matematičkom fakultetu u Sarajevu.



SVJETSKI DAN OSOBA SA DOWN SINDROMOM

Brojnim aktivnostima obilježili smo Svjetski dan osoba sa Down sindromom - 21.mart. Simbol ovog dana su šarene čarape. Nošenjem šarenih čarapa pokazujemo podršku osobama sa Down sindromom kako bi se što bolje integrirali u društvo.



TEMATSKE AKTIVNOSTI

Vrijedni učenici i učiteljice iz produženog boravka obilježavaju tematskim aktivnostima sve značajnije datume.




Različitim aktivnostima obilježili smo 6. april - Dan grada Sarajeva.

Likovni i literarni radovi, radionice posvećene kulturnim i historijskim znamenitostima grada i posjete muzejima bili su naš način da našem voljenom gradu iskažemo ljubav.



The chalkboard has "6.april" written at the top, followed by "Dan oslobođenja Sarajeva". Below that is a detailed drawing of a traditional Sarajevo fountain (ćuprija). To the right of the drawing is a poem:

Sarajevo je grad moj,
A svako mu se divi,
Rijetko ko može da odoli,
A da ga ponovo ne posjeti.
Jedinstven je to grad:
Energičan i topao,
Voljen od svih nas,
Ovo ću da kažem na sav glas!



POSJETA MUZEJU KNJIŽEVNOSTI I POZORIŠNE UMJETNOSTI BOSNE I HERCEGOVINE

Povodom Dana grada Sarajeva i Dana dječije knjige članovi Dramsko - recitatorske sekcije su u pratnji bibliotekarke Enide Krehić i nastavnice Sabine Beširević posjetili Muzej književnosti i pozorišne umjetnosti Bosne i Hercegovine. Učenici su imali priliku da pogledaju stalne postavke istaknutih bosanskohercegovačkih književnika kao što su: Silvije Strahimir Kranjčević, Isak Samokovlija, Petar Kočić, Branko Čopić, Zija Dizdarević, Mehmedalija Mak Dizdar, Hasan Kikić, Meša Selimović i Ivo Andrić.

Uživali su u raznim eksponatima iz oblasti pozorišne umjetnosti poput papirnih lutkica iz pozorišta sjenki, marioneta iz lutkarskog pozorišta, te raznih glumačkih kostima.



POSJETA IZLOŽBI RUČNIH RADOVA

Članovi sekcije engleskog jezika posjetili su izložbu ručnih radova koja se održala u Gazi Husrev-begovom muzeju. Izložba je bila iznimno zanimljiva te su naši članovi imali priliku upoznati se s tradicionalnim ručnim radovima. Ovo je bio izvrstan način da se članovi sekcije engleskog jezika upoznaju s bogatom kulturnom baštinom BiH, te su svi bili zadovoljni i inspirirani ovom posjetom.



MEĐUNARODNI DAN ZDRAVLJA

Učenici III1 i III2 razreda su obilježili Međunarodni dan zdravlja posjetom roditelja, doktora Nedima Tokića. Razgovarano je o važnosti i očuvanju zdravlja.

Učenicima IV-2 na času Odjeljenske zajednice pridružile su se dvije roditeljke, stomatolozi, i ukazale na važnost posjeta zubaru kao i na pravilno čišćenje i održavanje higijene zuba. Učenici su mogli na modelima vilice vježbati pravilno četkanje, a kasnije su zajednički radili zabavne nastavne lističe vezane za istu temu.

Niže razrede posjetile su učenice, članice sekcije Prve pomoći, i demonstrirale nam kako se pravilno zbrinjavaju povrijeđeni do dolaska ljekara. Preventiva i edukacija su sigurni putevi u očuvanju zdravlja. Učenici su bili markiranti što im se veoma dopalo i ovu prezentaciju učinilo zabavnom i zanimljivom.



POSJETA SAJMU KNJIGA I UČILA

Učenici od šestog do devetog razreda u pratnji nastavnica Bosanskog jezika i književnosti Enise Balićevac i Sabine Beširević, te bibliotekarke Enide Krehić posjetili Sajam knjiga i učila koji je trajao od 12. 4. do 17. 4. 2023. godine.

Mnogobrojne izdavačke kuće su uzele učešće ove godine, te imaju veliki izbor knjiga. Naša školska biblioteka se ponovila novim naslovima, tako da učenici mogu doći u biblioteku i posuditi knjigu.



Dan planete Zemlje

Učenici petih razreda su na sekciji Kultura življenja izradom dekorativnih predmeta - "Biljni terarijum", obilježili Dan planete Zemlje. Zahvaljujemo se i nastavnicima Vedrani Todorović Džindo koja je pružila malu pomoć učenicima tamo gdje im je bila potrebna.



Izložba radova ekološke sekcije

U našoj školskoj biblioteci 18. 4. održana je izložba radova članova Ekološke sekcije koju vodi učiteljica Dženeta Brajanac.



Sedrenik - Ekološka sekcija

U našoj područnoj školi na Sedreniku 19. 4. održana je izložba članova Ekološke sekcije sa Sedrenika. Ova izložba održana je u prisutnosti učiteljice koja vodi sekciju, Suade Smajić.



SVJETSKI DAN KNJIGE

Povodom obilježavanja Svjetskog dana knjige upriličeno je druženje sa bosanskohercegovačkom književnicom Denisom Karahasan. Učenici su priredili program u kojem su prikazane priče iz zbirke „Priče patuljka Ponaška“. Nakon toga su sa Denisom maštali, poželjeli su svojim drugarima zdravlje, ali i da uvijek slušaju svoje roditelje i učiteljice. Koristili su čarobni štapić, ali su dobili i šešir mudrosti, te postavljali zanimljiva pitanja našoj autorici, pa su dobili odgovore na sve što ih je zanimalo.


Svi smo uživali u kreativnim radionicama koje nam je priredila i realizovala divna Denisa Karahasan kojoj se od srca zahvaljujemo!

Knjige su naš svijet mašte!



DAN ENGLESKOG JEZIKA

Povodom Dana engleskog jezika, 23. aprila, šesti razredi su obrađivali lektiru „Changing places“ na kreativan način kroz igru „Readopoly“. Učenici su bili maštoviti i napravili svoje igre, a zadatak im je bio da u lektiri pronadu pitanja i odgovore i postavljaju jedni drugima.



Radionice za učenike i roditelje

U proteklom periodu organizovane su radionice za učenike V,VI,VII razreda na teme: Položaj u grupi i Reci NE,u saradnji sa Porodičnim savjetovalištem, a za roditelje učenika svih uzrasta organizirano je interaktivno predavanje na temu “Internet kao stil života - Zaštita djece u digitalnom okruženju”



**INTERAKTIVNO
PREDAVANJE
ZA RODITELJE**

Ciljna grupa: Roditelji djece svih uzrasta

TEMA:
“Internet kao stil života – Zaštita djece u digitalnom okruženju”

VRIJEME I MJESTO REALIZACIJE:
Ponedjeljak, 24. april 2023.
godine u 18,00 sati
Logavina 52 (prestorijske škole)

REALIZATORI:
„Porodično savjetovalište“

KANTONALNA AGENCIJA ZA
PORODIČNO
SAVJETOVALIŠTE
SARAJEVO

Dan sjećanja na ubijenu djecu Sarajeva

Učenici petih razreda prisustvovali su obilježavanju Dana sjećanja na ubijenu djecu Sarajeva.

16001

5. MAJ - DAN SJEĆANJA NA
UBIJENU DJECU SARAJEVA



DANI KANTONA SARAJEVO

Povodom obilježavanja Dana Kantona Sarajevo održana je promocija Infografike „Trinaest dobitnica odlikovanja Zlatni ljiljan“ i Graficke novele i Zbornika radova „Heroine Bosne i Hercegovine“. Članovi Historijske sekcije prisustvovali su promociji i tom prilikom preuzeli primjerak infografike za našu školu.



Sajam srednjih škola

Učenici devetih razreda su u pratinji svojih razrednica i pedagogice posjetili Sajam srednjih škola. Bila je to izvrsna prilika da se detaljnije upoznaju sa srednjim školama u Kantonu Sarajevo i nastavnim programima koji ih tamo očekuju.



Posjeta kinu prvih i drugih razreda

Učenici prvih i drugih razreda posjetili su kino CineStar i uživali u animiranom filmu "Cvrčak i Mravica".



Naše "Nebo izvrsnosti"


Na manifestaciji "Naše nebo izvrsnosti" prisustvovalo su učenice naše škole koje su na Kantonalnim takmičenjima osvojile prva tri mesta.

O našim izvrsnim učenicama i njihovim učiteljicama i nastavnici smo već govorili, ali evo još jedne prilike da im od srca čestitamo na postignutom uspjehu.



OBILJEŽAVANJE MEĐUNARODNOG DANA PORODICE

Porodica i porodične vrijednosti su jedna od važnijih oblasti kojima se škola bavi kroz sve nastavne i vannastavne sadržaje. Danas smo više nego ikada svjesni da se zdravoj i funkcionalnoj porodici mora svaki dan davati na značaju. Ove godine pripremili smo cijeli program **obilježavanja Dana porodice**. Organizovali smo izložbu likovnih i literarnih radova posvećenih porodici. Najuspješnije radove smo nagradili na prigodnoj svečanosti. Nagrađeni učenici su: Ali Meco, Berina Salihagić, Lamija Hadžiagić i Fatima Malagić. Organizovali smo Igre bez granica u kojima su učestvovali učenici i roditelji. Potrudili smo se da ovaj dan bude dan smijeha i radosti. Zahvaljujemo se roditeljima koji su učestvovali u igrama i na taj način pomogli u organizaciji ovog događaja.



Povodom obilježavanja Međunarodnog dana porodice, u područnoj školi "Mula Mustafa Bašeskija" na Sedreniku održana je priredba.





POSJETA PIONIRSKOJ DOLINI


Učenici V-3 razreda posjetili su Pionirsku dolinu i uživali u druženju!



POSJETA MUZEJU ILUZIJA

Razredi VI-1 i VI-3 posjetili su Muzej optičkih iluzija u pratnji razrednica Edise Bajramovic i Amre Karić. Ova interaktivna izložba omogućila je našim učenicima da istraže razne optičke iluzije te da se upoznaju sa načinom na koji naš mozak obrađuje vizuelne informacije. Sigurni smo da su naši učenici uživali u posjeti i stekli znanja koja će im biti korisna u budućnosti.





Proslavili smo 103. rođendan naše škole. Pjesmom, igrom, plesom, glumom i lijepom riječju poželjeli smo joj da još dugo postoji. Nagradili smo i pohvalili najuspješnije učenike. Ove školske godine veliki broj učenika zaslužio je pohvale za rad, trud, znanje i ponašanje. Na to smo posebno ponosni.

Družili smo se našim penzionerima. Drago nam je što se rado odazovu našem pozivu. Zahvaljujemo se roditeljima i svim prijateljima škole što su sa nama podijelili ove trenutke radosti.





Škola u prirodi i izleti učenika naše škole

Prema Nastavnom planu i programu u četvrtom razredu realizujemo Školu u prirodi. Ovogodišnja destinacija je bio Blagaj i hotel "Ada". Pored Blagaja i svih njegovih ljepota učenici su imali priliku posjetiti: Konjic, Jablanicu, Hutovo blato i Mostar. Proveli su tri izuzetno zanimljiva dana u učenju, igri, druženju i zabavi.



Brojni izleti su realizirani pred kraj školske godine. Učenici su posjetili različita mesta poput Pionirske doline, Trebevića, Tunela spaša, ZOO centar "Bambi". Učili su, zabaljali se, družili i uživali u blagodatima prirodne i kulturne baštine našeg Sarajeva.



DRUŽENJE NAJUSPJEŠNIJIH UČENIKA SA DIREKTORICOM

U želji da istaknemo važnost truda i rada i damo na značaju onima koji su nagrađeni i pohvaljeni za izvrsne rezultate organizovali smo druženje najuspješnijih učenika sa direktoricom.

Tokom druženja direktorica im je još jednom čestitala na uspjehu i zahvalila se u ime škole što nas tako dostojanstveno predstavljaju.



OGLEDNI ČAŠ IZ ENGLESKOG JEZIKA

Nastavnica Engleskog jezika u našoj školi, Emira Alikadić, održala je ogledni čas prema ishodima učenja u 4 – 3, a nastavna jedinica bila je London. Učenici su uživali skupa sa nastavnicom na ovom času.



Ogledni čas iz biologije

U odjeljenju 6-2 nastavnica Edina Čomor uspješno je realizovala čas Biologije po ishodima učenja na temu "Priprema zdravih obroka i zdrave piramide ishrane". Učenici su na kreativan i zanimljiv način shvatili koliko je zdrava i uravnotežena ishrana bitna za pravilan rast i razvoj.



ŠKOLA PLANINARSTVA

U organizaciji Ministarstva za odgoj i obrazovanje KS uz koordinaciju JU "Institut za razvoj preduniverzitetskog obrazovanja Kantona Sarajevo" realizovana je "Škola planinarstva".

"Škola planinarstva" planirana je u sedmom razredu, te su u skladu s tim učenici sedmih razreda u pravnji nastavnika Dževada Babića kroz tri pohoda, na Igman, Bjelašnicu i Trebević, prošli malu školu planinarstva i imali priliku da nauče osnovne planinarske korake i steknu znanja i vještine vezana za boravak na planinama.



Edin Salihagić rođen je 24. 10. 2013. godine i učenik je OŠ "Mula Mustafa Bašeskija", Sedrenik. Edin takođe voli fudbal i aktivno trenira spomenuti sport od 2020. godine u školi fudbala "Bambinosi" gdje učestvuje u mnogim takmičenjima i postiže izuzetne rezultate. Pred njim je još mnogo mukotrpnog rada i truda za koji vjerujemo da će uroditи još boljim rezultatima.



Eren Burazerović, reprezentativac Bosne i Hercegovine u hokeju na ledu selekcija ispod 18 godina je ujedno i perspektivni sportista naše škole. Takmičio se u diviziji III grupe A na svjetskom prvenstvu na Islandu. Inače igra za hokejski klub "Vukovi" za koji je prvi put nastupio sa 4 godine. Danas on govori za naš časopis.

"Dobar dan i hvala na mogućnosti da govorim za naš školski časopis. Hokejom se bavim već duže vrijeme, a put na Island je, nadam se, prvi od mnogih nastupa za reprezentaciju BiH. Hokej je za mene uvijek predstavljao neku vrstu razonodne, ali ujedno i izazova. Smatram da sam dosta svojih ciljeva u ovom sportu ispunio, ali još mnogo toga treba biti završeno. Do tada ću se truditi i raditi još više kako bih postigao još bolje i značajnije uspjehe. Želim svim vašim čitaocima sve najbolje i nadam se da ćete i vi postići sve svoje željene ciljeve."

Hvala ti Erene! Znamo da hokej nije tvoja jedina, kako kažeš, razonoda. Izvrsno sviraš klavir, odličan si učenik i Ponos generacije. Višegodišnji si tehnički urednik našeg časopisa i bez tebe bi ni ovaj broj "Čarobne riječi" ne bi ugledao svjetlo dana.

U ime članova redakcije, srdačno ti se zahvaljujem i želim još mnogo odsanjanih i ostvarenih snova.

Sigurno nije lahko živjeti vlastite snove, ali je važno od njih ne odustajati!



Ajnur Husejnović



Ovaj tekst o sebi pišem vama svima, a onima koji budu pažljivo čitali, želim prije svega sve najbolje. Želim poručiti da sanjate svoje snove i vjerujete u sebe, baš kao što ja sanjam i vjerujem da sutra postoji i čeka nas nešto bolje, kako za mene tako i za sve nas.

Maksimalno ću se potruditi da vam predstavim sebe jer nisam tip osobe koju možete svaki dan sresti nekoliko puta. Moje obaveze jednostavno mi ne dozvoljavaju mnogo slobodnog vremena. Nadam se da ću vam ovim tekstrom predstaviti jedan sportsko-školski život iz mog ugla.

Zovem se Ajnur Husejnović i učenik sam osmog razreda Osnovne škole "Mula Mustafa Bašeskija" u Sarajevu. Moja razrednica je Enisa Balićevac. Također sam aktivni član i golman hokejaškog kluba "Vukovi" Sarajevo U14 selekcije, te član reprezentacije Bosne i Hercegovine U16 selekcije u hokeju kod trenera Nermina Alića i Harisa Mrkve.

Moj sportski život, uz aktivno i redovno školovanje, zahtjeva mnogo odricanja, truda i zalaganja, kako na sportskom, tako i na školskom planu. Za sada sve stižem uredno i sve ide svojim tokom, te sam izuzetno zadovoljan postignutim rezultatima.

Moj dan započinje ranim buđenjem i pripremom za školu. S obzirom da sam u školi uvijek u prvoj smjeni, odlazim na nastavu do 8 sati, gdje obično boravim do 13:15. Nakon nastave odlazim kući na ručak, obavljam zadaću, ponavljam lekcije koje trebam naučiti i idem na Zetru, gdje se nalazi ledena dvorana, na dnevni trening koji obično bude timski ili golmanski. Ti treninzi su obično oko 16 ili 17 sati i traju jedan sat. Nakon toga se vraćam kući na večeru i kratki odmor, a zatim se ponovno vraćam na trening u 20 sati koji traje do 22 sata. Pošto me roditelji voze na večernje treninge i vraćaju kući, već oko 22:45 sam kod kuće. Pripremam knjige za naredni dan, ponovim nešto vezano za školu, pojedem neko voće ili lagani hranu i pripremim se za spavanje. U krevetu sam već oko 00:30. Naredni dan, naravno, započinjem buđenjem oko 7 sati. Moj sportski život zaista zahtijeva mnogo vlastitog truda, zalaganja i odricanja, kao i veliku požrtvovanost kako od mene, tako i od moje porodice. Uvijek se dogovaramo i usklađujemo naše obaveze kako bismo sve lakše podnjeli.

Ako se pitate kako sve postižem, mogu vam reći da je to ono što volim. Kada volite nešto, možete postići sve što poželite.

Sezona hokeja na ledu obično počinje polovinom septembra, zajedno sa školom. Moji radni dani uglavnom su ispunjeni istim aktivnostima, koje uključuju školu, treninge i ponekad i kurs njemačkog jezika.

Petak je uglavnom rezervisan za pripremne treninge ako igramo kao domaćini utakmica ili kada putujemo, jer naš klub igra u hokej ligi Srbije i regionalnoj ITHL ligi, koja uključuje klubove iz Hrvatske, Srbije, Bosne i Hercegovine, Slovenije, Turske i Bugarske.

Prošla sezona bila je vrlo uspješna za mene i moj klub. Vukovi su dostojanstveno predstavljali boje svog grada i države, a ja sam uspio izboriti poziciju najučinkovitijeg golmana U15 ITHL lige u jakoj konkurenciji. Kao nagradu za dobre rezultate, dobio sam poziv od slovenačkog hokejaškog kluba Lisjak iz Maribora da od naredne sezone nastavim školovanje i treniram u njihovom klubu. Naravno, oduševljen sam ovim pozivom i nakon konsultacija sa roditeljima te posjete Mariboru i klubu, odlučio sam da je Maribor odličan izbor za moj daljnji sportski i školski razvoj. Nakon mnogo odricanja, truda i rada u proteklim godinama, dobio sam priliku da se razvijam u još boljem svjetlu i da jednog dana zaigram kao prvi Bosanac i Hercegovac u nekoj još boljoj hokejaškoj ligi, kao što su KHL i NHL.

Nastavljam sanjati svoje snove i želim svima vama preporučiti da se uvijek bavite onim što zaista volite i da sportski duh volite najviše, jer sport vam uvijek nudi mogućnost da vodite zdrav život.

DRŽAVNO PRVENSTVO U STONOM TENISU U KATEGORIJI KADETA

U Banja Luci je održano završno državno prvenstvo u stonom tenisu u kategoriji kadeta. Naša Emina Cerić se takmičila u tri kategorije kadetkinja i to: pojedinačno, dubl i mix. Osvojila je sve tri zlatne medalje i potvrdila da je neprikosnoveni državni prvak u stonom tenisu u kategoriji kadetkinja.

Čestitamo !



Internacionalni turnir "Suada Dilberović"

Početkom mjeseca aprila u Zetri, održan je međunarodni turnir u ritmičkoj gimnastici pod nazivom "Suada Dilberović". **Alejna Zelihić**, učenica III-1 razreda, u jakoj konkurenciji, osvojila je II mjesto . Čestitamo!



Naša **Aylin Zendilović**, učenica drugog razreda, osvojila je drugo mjesto na međunarodnom turniru ritmičke gimnastike "Suada Dilberović" u Zetri. Čestitamo!



Intervju sa...

Za ovaj broj našeg časopisa govorila je cijenjena učiteljica Elvira Borić.
Razgovori s njom su uvijek, topli, zabavni i poučni! U nastavku pročitajte o čemu smo to razgovarali i poslušajte njene dobronamjerne savjete.



1. Koja je Vaša osnovna motivacija za bavljenje ovim poslom?

Da li je to prvi izbor ili splet okolnosti?

Moja osnovna motivacija za bavljenje ovim poslom je ljubav prema djeci. Oduvijek sam željela biti učiteljica. Još kao djevojčica igrala sam se ŠKOLE i uvijek sam ja bila UČITELJICA.

2. Kako biste opisali posao nastavnika/učitelja?

Posao nastavnika je veoma lijep. Nastavnik ima priliku da prati kako djeca rastu, napreduju i kako stiču nova znanja. Biti nastavnik je za mene najljepše zanimanje na svijetu jer je nastavnik okružen djecom, a uz djecu uvijek idu igra, smijeh, veselje, nježnost, iskrenost...

DJECA = LJEPOTA, LJUBAV, SREĆA

3. Šta je prednost, a šta su mane vašeg poziva?

Prednost mog posla je ta što je svaki dan drugačiji.

Djeca mi ne daju da ostarim.

4. Gdje pronalazite nove ideje za rad sa učenicima?

Nove ideje za rad sa učenicima pronalazim posmatrajući i slušajući svijet oko sebe. Koristim priliku da odem na neki seminar i steknem nova znanja i vještine.

5. Šta mislite, šta je to što učenici traže od nastavnika/učitelja?

Učenici traže poštivanje i razumijevanje.

Da bi učenici poštovali nastavnika, treba i nastavnik da poštuje njih. Učenici treba da osjete da smo im prijatelji i da smo uz njih u dobrom i manje dobrom situacijama.

6. Vjerujem da ste nailazili na mnoge zanimljive situacije. Možete li za naš časopis ispričati jednu anegdotu s časa?

Jedna anegdota sa časa... Ima ih mnogo i sad razmišljam.

7. Da li postoji nešto što Vas naročito ljuti u učionici?

Ne postoji nešto što me naročito ljuti u učionici.

8. Imate li neku poruku za učenike kako da provedu ljetni raspust?

Moja poruka za naše drage učenike:

Draga djeco, uživajte u svakom danu sa vama dragim osobama.

Slušajte svoje roditelje, družite se sa vršnjacima negdje u prirodi,

a kad se osamite neka vam društvo pravi DOBRA KNJIGA.

BAJRAM U NAŠOJ ŠKOLI

Bajram smo obilježili učeničkim čestitkama i likovnim radovima.



PORODIČNE TRADICIJE

Meni godina dana izgleda kao jako dug period. Na početku svake godine radujem se prvim danima Bajrama. Nije bitno da li je Kurban-bajram ili Ramazanski bajram. Pošto se 15. maja obilježava Dan porodice, a bajrami su posebna stvar u mojoj porodici ispričat će vam kako izgleda Ramazanski bajram u mojoj porodici.

Kada otvorim oči i vidim sunčevu svjetlost, odmah pomislim: „Bajram je!“ Hitro ustanem iz kreveta i počnem se sređivati. Čekam oca i brata da se vrate kući sa bajram-namaza. Kada dođu, svi zajedno idemo kod mog amidže, jer je on najstariji u porodici. Moja strina nam uvijek za bajramske jutro priprema bosansko-turski doručak, jer ona jako dobro kuha. Poslije doručka slijedi bajramska kahva i naravno, baklava ili neki drugi zaliveni kolač. Poslije doručka, ja se vraćam kući, i iščekujem goste. Babo mi uvijek priča kako su to izgledali bajrami prije i da je on mnogo plakao uoči Bajrama. Bilo mu je teško poći na Bajram jer je znao da kada izađe napolje ništa nije isto kao prije. Ostavljao je za bajram novu košulju i pantalone, koje bi mu nana oprala. Nana je imala želju da jednoga dana, kada budu bolja vremena, spremi svoga sina za Bajram-namaz. Ljudi su kako kažu trčeći odlazili na Bajram-namaz. Mnogi od njih su poginuli. Babo kaže da su se i posljedne zalihe i dijelile po cijeloj mahali. Svi bi dobili pomalo. Tako je bilo nekoliko godina, ali se rat napokon završava. Obično moja nana i tetka, a mamine strane, dolaze ujutru prve. Nana nam uvijek donese neki kolač, iako moja mama i ja svaki bajram pravimo baklavu i bombice. Oko podne, moje tetke sa babine strane dolaze na ručak. Za bajramskom sofrom obično se nalazi begova čorba, sitni čevap sa rižom, krompir i filete, nanina tradicionalna pita zeljanica i sircica, uz različite salate. Poslije ručka, naravno, baklava.

Moji rođaci i ja, ne samo za Bajram, se družimo i provodimo vrijeme zajedno. Mi smo svi odgajani i naučeni da budemo kao braća i sestre, da budemo jedni drugima vjetar u leđa, a ne nož, da smo tu jedni za druge uvijek, da nam je lijepo... Jer na kraju dana to je ono što porodica ustvari jeste. Potpora. Snaga. Ljubav. Sreća. Podrška. Za mene je porodica svoje bogatstvo, i za nju sam najzahvalnija. Svoj život ne bih mogla zamisliti bez svoje porodice, uže i šire. Ako jednoga dana sve izgubim, uvijek znam da imam njih. Zato sam jako zahvalna za moju porodicu i oni su upravo ono što mene ispunjava.



Emina Kurtović, VII-2

Perom i kistom naših učenika

Sarajevo

Poseban je dan 6. april, dan našeg Sarajeva, dan velikog borca, koji se iznova dizao iz pepela, iznova oslobađao teških okova, dizao nakon svakog pada, jači, ljepši, sjajniji nego prije. Grad spojen iz različitih perioda, kultura, naroda, vjera, ali uvijek s jednom dušom i jednim srcem, pružajući utočište svakom svom građanu, ali i dobrodošlicu posjetiocu. To je grad bogat historijom. U jednom trenu ste u starom Osmanskom carstvu među džamijama, česmama, Sebiljem, a već u sljedećem trenu ste u Austro-ugarskoj i njenim veličanstvenim zgradama. Tako se ta doba isprepliću i čine jedan jedinstven grad, koji je iznjedrio mnoge umjetnike, pjesnike, nobelovce, oskarovce... tako malen, a tako bogat. Baščaršijom se osjeća zanosan miris čevapa i mnogih drugih specijaliteta, a doći u Sarajevo i ne napiti se vode sa Baščaršije je nezamislivo. Međutim, ono što Sarajevo čini posebnim su njegovi ljudi i onaj čejf koji samo oni imaju, gdje su svi isti, svi dobrodošli i svi su „raja.“

Nadya Bektić, VI-2



Proljeće u mom oku

Svake godine željno iščekujem proljeće. Radujem se suncu, zelenilu, beharu, cvijeću. Uvijek nekako donese ljudima radost i sreću. Zamiriše čitav kraj. Osmijehom ukrasi lica djece.

Ove godine proljeće nekako sporije stiže. Sunce proviri pa ga prekriju sivi oblaci. Kao da zna da meni nije baš do radosti. Ovog proljeća izgubila sam jednog divnog, ljubaznog, brižnog i dobrog čovjeka kojeg sam neizmjerno voljela, mog dedu. Početak proljeća ostavio je duboki i neizbrisivi trag o kraju jednog dobrog bića, najljepšeg prijateljstva i ogromne ljubavi. Moj dedo je bio pekar i veoma je volio djecu. Često smo odlazili u pekaru i zajedno pravili picu. Razgovarali smo, šalili se, smijali i jeli. Nedostaje mi mnogo.

I proljeće kao da tuguje sa mnom. Čvrsto čuva svoje zrake da ne izbrišu tugu u mom oku. Ja znam da sva živa bića završavaju svoj životni put, ali drago mi je što proljeće ove godine kasni.

Sara Ljušaj IV-1

Perom i kistom naših učenika

BUDUĆA PRIJATELJICA

Bilo je to nekad davno. Igrala sam se s prijateljima u parku.

Odjednom, na moj nosić sletio je šaren leptirić. Činilo mi se da ga razumijem. Gledali smo se neko vrijeme, a potom me poveo do obližnje klupe, gdje je bila mala, predivna djevojčica. Ta djevojčica duge, plave, blistave kose, čarobnim štapićem je kamenje pretvarala u lijepo cvijeće, a otpatke u razigrane životinje. Ona je znala mene, moje ime. Ja sam se malo prepala, ipak bila je to čarobna djevojčica. Predstavila se kao Zlatokosa, magična prijateljica iz budućnosti. Povela me je u budućnost i njezin svijet. Zamahnula je rukama i pred nama se stvorio zmaj, koji nas je poveo u obilazak. Prvo smo obišli Zemlju slatkisa, u kojoj su kuće od čokolade i prozori od marmelade, a iz fontane izlazila je šarena, šećerna vata. Nakon toga smo otišli u Zemlju vila i vilenjaka koji ispunjavaju želje. Poslije toga me je odvela u Zemlju ljubavi i mira, sreće i drugarstva. A na kraju smo završili u njenoj rodnoj zemlji, u kojoj su svi bili bezbrižni i imali su super moći. Imala sam osjećaj da bi bila presretna u toj zemlji. Odjednom sam čula neku viku i zvonjavu. Neko me je vukao za rukav. To je bila moja sestra koja me je budila za školu.

Nažalost, to je sve bio jedan prekrasni san. Tog dana sam bila jako tužna, jer ta prijateljica i njene moći nisu istinite.

NADŽA ĆUROVAC V-2

BOSANSKI ĆILIM

Kada neko spomene bosanski ćilim ja odmah pomislim na svoju nanu Fatimu. Bosanski ćilim za mene nije samo ćilim. On je mnogo više od toga.


To je pregršt uspomena. Istkan je vunom u predivnim šarenim bojama. Najviše ima crvene boje koja se dobija od biljnih sastojaka. Sjećam se kad sam bio mali da sam vozio autiće po cik-cak linijama, trouglovima i oblicima koji podsjećaju na kornjaču. Ta prostirka za pod me znala izgrevati po koljenima dok sam se valjao po njoj. Moja nana mi je jednom rekla da ga je dobila od svoje majke koja ga je izradila svojim rukama. Bosanski ćilim se čuva i prenosi sa koljena na koljeno kao porodično naslijeđe.

Moje nane više nema. Iza nje je ostao bosanski ćilim koji ukrašava sobu mog najstarijeg brata. Još uvijek volim da se valjam po njemu jer me podsjeća na moju nanu.

Abdullah Saad Panjeta IV-1

Perom i kistom naših učenika

EFIRNA ŽUPANIJA ZADAR



Perom i kistom naših učenika



Naši maturanti

Na izmaku je još jedna školska godina, za naše maturante posljednja u ovoj školi. Od malenih daka prvaka kroz ovih devet godina izrasli su u vrijedne i sposobne mlade ljude pred kojima je velika životna prekretnica. Trudili su se, radili, učili, sazrijevali i kroz sve to sanjali svoje snove. Najiskrenije se nadamo da će slijediti srce u ostvarivanju svojih snova, jer čovjek samo srcem dobro vidi.

U nastavku vam donosimo nekoliko riječi o razredima, o sportistkinjama generacije te o onima koji su ponos svoje generacije.



"Tako brzo i iznenada našem devetogodišnjem druženju dode kraj. Kazasmo da nam neće faliti ovaj razred, a sada bismo dali sve da bar još malo ostanemo dio njega.

Svaka tuga prošla je, svaka rana zarasla je, svaki osmijeh u toj učionici ostao je. Sada odlazimo i prepuštamo naše mjesto novim generacijama koje stižu."

Razred IX-2

Naši maturanti



"Prošlo je dosta vremena kako smo prvi put ušli u ovu školu, puni uzbudjenja i sreće upustili smo se u školske obaveze. Danas tim obavezama dolazi kraj. Kroz mnoga toga smo zajedno prošli i zato vam svima hvala. Nadamo se da ćemo se u budućnosti opet vidjeti kao uspješni, odrasli ljudi, a do tada vam želimo svu sreću.
Pozdravlja vas vaš IX-1"

PONOS GENERACIJE

Ponos generacije nije lako biti. Moraš se mnogo truditi i sve petice imati.

Nocima budan moraš bjeti da bi na tebe ponosni mogli biti! Uprkos zamoru velikom i trudu uloženom danas smo zahvalni svima koji su na ovom putu koračali uz nas! Veliko hvala roditeljima koji su nas podrili i veliko hvala nastavnicima koji od nas nikada nisu odustali! Nastojat ćemo ovu čast dostojanstveno braniti i vaš ponos ostati kroz sve životne vihore i oluje koje nam predstoje!



Ponos generacije su: **Emina Ganić, Eren Burazerović i Kenan Zlatar**, dok su odlični učenici tokom prethodnih godina bili: **Nejra Ablaković, Amina Šeko, Una Biberović, Merijem Fatkic, Nejra Drinjaković, Emina Cerić, Erna Arnautović, Ajša Lepenica, Lejla Salihagić, Emrah Kulo, Karim Kamenica.**

SPORTISTKINJE GENERACIJE

Ove godine naša škola s ponosom predstavlja tri ursne sportistkinje i to: Eminu Dozo, Nejru Ablaković i Eminu Ceric. U nastavku pročitajte šta su trenirale, kakve uspjehe su ostvarile i šta imaju da poruče mlađim naraštajima.



Zovem se Emina Dozo i učenica sam IX-1 razreda. Tokom proteklih devet godina, kako u školi, tako i izvan nje, trenirala sam različite sportove: fudbal, odbojku i košarku. Kroz niz različitih aktivnosti u spomenutim sportovima ostvarila sam značajne uspjehe kao što su: drugo mjesto na Općinskom takmičenju iz košarke, treće mjesto na Općinskom takmičenju iz fudbala, drugo mjesto na Federalnom takmičenju u Zenici gdje sam dobila i nagradu za najboljeg igrača turnira.

Svima vama želim da osjetite trenutke sreće i euforije koje sa sobom donosi sportski uspjeh, ali da biste to osjetili izaberte ono što volite i odlučite da budete najbolji u tome!

Moje ime je Nejra Ablaković i učenica sam IX-1 razreda. Ove godine imam čast sa svojim prijateljicama dijelim titulu sportistkinje generacije. Da budem iskrena, za ovaj uspjeh trebalo je mnogo truda, rada i zalaganja, ali se svakako isplatilo. U svojoj petoj godini života počela sam trenirati plivanje i još uvijek sam u istom sportu. Ostvarila sam odlične rezultate na državnim i međunarodnim turnirima. Posebno bih izdvojila prvo mjesto na državnom prvenstvu Bosne i Hercegovine u tehnici delfin, te treće mjesto na međunarodnom turniru u tehnici kraul i prsa.

Pored plivanja u školskim sportskim sekcijama sam aktivno učestvovala i sa svojim ekipama predstavljala našu školu.

Velika je čast ali i obaveza biti sportistkinja generacije i trudit ću se da je dostojanstveno nosim.

Vama, mlađi ljudi, poručujem da istražite i upoznate sebe jer to je jedini način da pronadete put ka sreći.

Ja sam Emina Ceric i učenica sam IX-1 razreda OŠ "Mula Mustafa Bašeskija". Trenutno se nalazim na važnoj životnoj prekretnici i jedino što sigurno znam je da od stonog tenisa neću odustati.

Dugi niz godina bavim se ovim sportom i iza sebe imam fantastične rezultate. Trenutno sam kapiten kadetske reprezentacije Bosne i Hercegovine u stonom tenisu i državna prvakinja u kategoriji kadeta. Moji ciljevi su visoki, ali nisu nedostizni. Sviima vama koji se dvoumite da li da se bavite nekim sportom ili ne, poručujem da je svaki sport bolji od uzalud potrošenog vremena. Pronadite svoj put ka sreći i zadovoljstvu tako što ćete izabrati sport i zdrav način života!

Maturalna zabava



IX-1 i IX-2

Kako ugodno provesti ljetni raspust?

Ljetni raspust je stigao! Svako od nas tražit će način kako da ga kvalitetno provede. U ovom broju školskog časopisa donosimo vam nekoliko savjeta kako da kvalitetno iskoristite vrijeme i da se dobro zabavite i odmorite.

Nadite sebi prostor unutar kuće/stana i uredite ga po vašem ukusu. Dok su velike temperature vani, vi možete uživati u mirnom i hladnom kutku sami.

Ograničite korištenje elektronskih uređaja kao što su: mobitel, tablet, laptop, TV i slično.

Sa svojom porodicom odredite dane za zabavu. Na kalendaru zabilježite dane kada ćete ići na bazen, u šetnju šumom ili posjetiti neki muzej i slično.

Zabavite se sa svojim priateljima, provodite vrijeme sa njima i stvarajte uspomene.

Pronadite svoj talenat i počnite se baviti nečime novim.

Istražujte nove stvari. Istražujte o novim gradovima njihovim znamenitostima i slično.

Pročitajte bar jednu knjigu i proširite svoje znanje.